

杨忠愍集

楊忠愍集

楊忠愍公集卷首

世祖章皇帝御製表忠錄序

自古賢臣正士効力王家率授命致身捐生赴義跡其所遭若無厚幸然而時過論定聲稱振揚迄於代遠風遙流徽彌茂流連曩迹如邁其人是以孟軻有言奮乎百世之上百世之下聞者莫不興起也夫當其矢心靖獻奮不顧軀豈逆覩後人美歎靡窮哉獨以浩然之氣成特立之操內無懼心外無慙德而已顧竭志盡忠者人臣之誼善善惡惡人之公循省往哲愛結於中誠有不能自己者乎

幾之暇紬繹載籍每見忠孝

節義之事未嘗不以覆三致意焉至明史嘉靖年間有
直臣楊繼盛者以諫死於戲賢哉觀其効仇鸞嚴嵩二
疏凜凜乎烈丈夫矣夫尊爵厚祿握權當軸者何可勝
道然當時則榮沒則已焉甚或遺穢蒙嗤爲世昭鑒去
繼盛奚翅霄壤哉使繼盛獲遇明主庸其言顯其身其
所建豎必有卓然可觀者而竟不得志而歿與龍逢比
干先後合轍亦可悲矣朕讀其文傷其意慨然想見其
爲人故特表而出之以旌忠鯁垂法將來由斯以觀卽
謂繼盛至今存可也

世祖章皇帝御製表忠錄論

朕觀有明二百七十餘年忠諫之臣往往而有至於不畏彊禦披膈犯顏則無如楊繼盛而被禍慘烈殺身成仁者亦無如繼盛云當是時其君端拱修立委政輔弼而逆臣嚴嵩父子盜執大柄濁亂王家威福擅專紀綱蕩廢在廷之臣皆洶洶阿諛奔走承順繼盛獨能伸大義聲其十罪更彰其五姦使隱然昭明稔惡暴白豈非獨行不懼者哉夫繼盛特曹郎耳非有貴戚之誼股肱之任與拾遺補闕之責也以疏逖之臣惡權寵之姦遂思執白簡而彈去之其勢不敵夫人知之矣乃毅然不

顧且繼盛一官又非未經摧折者方仇鸞主馬市議時
眾皆頻首縮頸塞默不敢異繼盛排羣說力言不可致
權臣無他刑之瀕死謫官還方歷尉令始得一至曹郎
令他者處此且保軀固位未遑安敢復蹈前迹而繼盛
歷事未月又有捨身圖報之章蓋念君恩難負茲輔難
容建言甯計崇卑報國不憂生死洵忘身殉君忘家殉
國者也且是時嚴嵩與仇鸞隙思繼盛言遂欲立貴之
以爲己用故數假王命內示其私繼盛儻一委蛇可立
取通顯不卽緘口屏息循職自効亦何所不容而乃重
公室藐權門慷慨叫閭從容就義有臣如此良國之砥

柱哉蓋繼盛自有生後夙罹閔凶艱苦備至故堅貞之
性百折弗回可謂富貴不能淫貧賤不能移威武不能
屈者矣嗟乎繼盛值諱言之朝無立言之責尙能不畏
彊禦披膈犯顏如此今之爲臣者乃身任言職直節罔
聞感私德而辜主恩畏權威而忘國事以視繼盛能不
媿然汗下哉朕故咏浩氣丹心之句不勝三歎爲直臣
惜也

順治十三年歲次丙申仲春朔日

州志卷之七

州志卷之七

州志卷之七

州志卷之七

州志卷之七

州志卷之七

州志卷之七

州志卷之七

州志卷之七

州志卷之七

欽定四庫全書總目提要

楊忠愍集三卷附錄一卷明楊繼盛撰繼盛字仲芳號椒山容城人嘉靖丁未進士官至兵部武選司員外郎以疏劾嚴嵩爲所構陷棄市後追贈太常寺卿諡忠愍事蹟具明史本傳繼盛本以經濟氣節自許不屑屑於文字後人重其人品掇拾成編仰蒙

世祖章皇帝御製序文表其忠藎一經褒予曠世猶生故雖朽蠹陳編彌深寶惜此本乃康熙間蕭山章鉅所校凡奏疏一卷雜文一卷詩一卷行狀碑記別爲一卷附焉其論馬市劾嚴嵩二疏史傳限於體裁僅存大略集本

乃其全文披肝瀝膽伉直之氣如生自作年譜一篇學問人品具見本末尤史傳所不能詳遺囑一篇作於臨命前一夕墨蹟至今世守倉卒之際數千言無一字塗乙尤足見其所養詞雖質樸而忠孝之意油然而尤足以感動百世惟年譜中自記從韓邦奇學律夜夢虞舜一事頗涉怪異然繼盛非妄語者蓋覃思之極緣心構象世說載衛玠以夢問樂廣廣云是想管子曰思之思之鬼神通之固亦理之所有昔吳與弼作日錄自稱夢見孔子人疑其僞繼盛此語頗與相類明以來無疑之者此則係乎其人有不待口舌爭者矣

高宗純皇帝御製讀楊忠愍集詩

家學關西素行涇浩然惟與義爲鄰一生名節堂堂在
兩疏風霜字字新報國不辭履虎尾排奸直欲犯龍鱗
開編省識忠良氣不愧牽衣折檻臣

御製忠祠詩

保定府治西
祀明楊繼盛

捐軀不畏逆龍鱗兩疏千言萬古新直使權臣陰喪膽
何妨烈士顯忘身降神獨萃扶輿氣懷古重過涇水春
居節丹青藏寶笈

內府藏居節所畫小
像入石渠寶笈上等

鬚眉宛是個中
人

御製居節畫楊繼盛小像詩

有生孰不惜華年生死還應義以權遐想皋夔千載上
豈辭龍比一身捐鬚眉正色真無忝史策芳名歷久傳
西市從容吟四句丹心浩氣至今懸

明御製誥命

皇帝制曰貞臣篤靖獻之義弗慮險危熙朝昭激勸之
公罔遺存歿矧殺身而爲國宜特典以褒功爾故原任
兵部員外郎楊繼盛剛方賦性忠藎存心方筮仕於留
曹輒建言而外謫有聲民牧旋晉兵部殫志効官攄誠
抗疏論罷馬市深懷啓釁之憂指斥柄臣力矢糾愆之
悃言已見知於當宁身終不免於權奸追念忠賢特申
卹錄茲贈爾中順大夫太常寺少卿謚忠愍錫之誥命
於戲綸綍寵褒用慰孤忠於已往聲光普赫益培正氣
於方來耿耿爾靈尙歆朕命

隆慶元年十月二十三日

明御製祭文

維隆慶元年歲次丁卯冬十一月壬子朔越二十六日
丁丑皇帝遣直隸保定府知府張烈諭祭原任兵部員
外郎贈中順大夫太常寺少卿諡忠愍文曰惟爾剛方
秉性慷慨致身令聞早著於南曹抗疏屢陳於北闕始
論馬市之當罷析敵情而直氣巖巖旣斥權奸之當誅
履禍機而忠肝烈烈其言卒驗其命已傾死者不可復
生百身難贖枉者不可不直三命宜頒遵遺詔以加恩
憫孤忠而錫卹特贈爾中順大夫太常寺少卿諡忠愍
葬祭並加錄蔭是逮式顯忠貞之節庸倡蹇諤之風英

爽不磨渥恩斯服

楊忠愍公諫像

